



## Fasnacht 2008

Mit Gummiknüppel ains uffs Dach,  
Handschelle aa und ab ins Fach.  
Drogetescht und Bluetprob nää,  
zwei Daag Haft duets au no gää.  
Y ha nur, ych darf's nit verzelle,  
in dr Baiz ains rauche welle.

Dr greeschti Schlager sitt's Muusig gitt,  
dr Schacher-Seppli isch dää Hit.  
Als Schwyyzer Sportler vom Joor isch gwäält,  
dr Schwinger-König, das het uns gfäält.  
Si kennte jo, s'duet my nit quääle,  
als dümmschte Schwyyzer e Zyrcher wääle

Dr Trainer fuurt, dr Schwarz ewäg,  
bim EHC hän si dr Drägg.  
Die Bursche sin nur no zem lache,  
ych als Trainer wurd's anderscht mache.  
D'Schlittschueh wäg, das duet si haile  
und jedem e Gluggersagg verdaille.

An Wiehnacht will ych fryndlig sy,  
schryyb in e Karte Glyckwynsch dry.  
Loos bi dr Boscht e Marge uuse,  
schläg si ab, do kunnt mer's gruuse.  
vorne seesch dr Federer wingge,  
hinde duet's nach Schwaiss - Fyess stingge,

S'frogt my ain an dr Fälbärgstroos,  
was machsch so spoot isch ebbis los.  
"Hösch" sag ych, s'het me my Frau,  
Uuse gstellt und dr Koffer au.  
Aifach numme, will si my Bett,  
an e Eurofan vermietet het

Dr EHC het Gäldproblem,  
dert stirbt jetzte s'ganz System.  
E Sponsor wird dert dringend gsuecht,  
me het scho mänggi Sach versuecht.  
So dief im Loch s'isch aifach grass,  
e Vertrag gits nur mit Dignitas.

In Laufe han ych aine droffe,  
dä syg letschti fascht versoffe.  
Das Hochwasser um Laufe umme,  
in de Gschäfte isch alles gschwumme.  
D'Kottlett vom Metzger uff dr Wälle,  
verkauft är jetzt als Birs Forälle.  
Bim Früchtestand duet sich's loone,  
verkauft sythär Wassermeloone.  
Im Möbelgeschäft wos Möbel hett,  
griesch e huffe Wasserbett.  
Bi dr Heere-Mode dert in Laufe,  
kaasch neyi Taucher Aazyyg kaufe.  
Dr Tabaklaade kasch begryffe,  
verkauft jetz nur no Wasserpfyffe.  
Im Zoogschäft waiss me, dass isch s'schlimme,  
dass Goldhamschchter nit kenne schwimme.  
Und im Damegeschäft ischs wie dehai,  
dert hän d Puppe s'Wasser in de Bai.

Dr Blocher sait no voller Stolz,  
"ich bin halt aus anderem Holz".  
Dä Dräck do inn, das isch e Gruus,  
süübere will ych s'Bundeshuus.  
Die lingge hän e Bäase brocht  
und dr Christoph uuse blocht

---

Wottsch au by uns bänggle ?  
Schigg doch aifach e Brief in unser Boschtfach  
VSG Postfach 4365 4002 Basel  
Oder goosch uff, [www.vsg-basel.ch](http://www.vsg-basel.ch)

---